

OTRO INVESTIGACION PISA DI DROGA

ORANJESTAD (AAN): Te ainda un investigacion profundo ta tumando lugar na Hulanda riba dos Curasoleño di cual un di nan lo tin vinculo cu un empleado na aeropuerto.

Informacion cu DIARIO ta dispone di dje ta indica cu e dos personanan aki pa basta tempo caba lo ta ser sigui pa efectivonan di Departamento di Droga na Curaçao, combina cu autoridadnan Hulandes cu lo ta tras di nan, y cu ambos a ser aresta recientemente na Schiphol.

Tabata trata aki di e hombernan di inicial R. y H., y den nan poder segun informe lo a haya un cantidad di droga cu supuestamente lo a sali sea for di Curaçao of Aruba.

E caso aki ta den full swing di investigacion na Hulanda y por spera orden pa detencion di un of mas persona cu lo por tin saber di e caso aki.

MAX CROES LO KEDA COMO GOBERNADOR INTERINO

ORANJESTAD (AAN): Sin duda alguno informacionnan ta mustra cu Mr. Maximo Croes lo keda fungi como Gobernador interino.

Manera ta conoci desde 1986 Mr. Max Croes ta fungi como Gobernador interino den nos Pais Aruba, pa ser exacto dia 2 di Mei 1986 el a asumi e funcion aki y segun informe riba alto nivel Mr. Max Croes ta goza di e confianza di un persona masha respetada.

Su termino como Gobernador interino ta termina na luna di Mei dia 2. E forma pa nombra un Gobernador interino ta casi igual pa nom-

bramento di un Gobernador di Aruba.

Manera ta conoci, ta tur partido politico mester bay di acuerdo cu e nombrenan cu ta ser treci dilanti. Den e caso aki esaki tambe lo tin cu ser haci segun fuente gubernamental Hulandes.

E posibilidad ta grandi cu e lo por ser nombra un biaha mas pa e periodo di 6 aña.

E experiencia cu e tin como gobernador interino lo por yuda nos gobernador nobo Mr. Lin Koolman, ya cu e puesto como gobernador tin hopi cos ta bin acerca di solamente carga e number como tal.

RECONSTRUCCION DI CRUZADA DI SANTA CRUZ A CUMINZA

ORANJESTAD (AAN): Trabaonan necesario di construccion a cuminsa ayera na e cruzada banda di Frank Auto Parts y Club Estrella na Santa Cruz. E cruzada aki lo ta cera te cu dia 22 di Februari.

E noticia aki DIARIO a ricibi di Comisario di Polis, na number di Alto Inspector R.H. Nicolaas.

Trafico cu ta moviendo den direccion norte riba e caminda di Kibaima pa Tanki Flip, lo mester desvia na e cruzada-T cu e caminda cu ta conduci pa Papilon. Trafico cu ta bayendo sur riba e caminda di Tanki Flip pa Kibaima, lo mester bira na e cruzada-T pa e caminda cu ta

conduci pa Kas Ariba.

Trafico moviendo den direccion oost riba Caya Betico Croes lo mester desvia na e cruzada banda di Antonius College. Di otro banda, e carretera lo ta cera te banda di Hulpbestuurskantoor.

Relaciona cu esaki y cu bista pa seguridad y libertad di trafico den vecindario di e parti aki, ta necesario cu e usuarionan tuma precaucion y tira bista riba reduccion di velocidad y pa nan adapta nan mes na e cambianan den e situacion nobo aki.

Ademas, e medidanan lo ta visible pa medio di borchinan di trafico, barinan di trafico, y borchinan di indicacion.

GUARDIA NACIONAL VENEZOLANO A DETENE ARUBANO

ORANJESTAD (AAN): Un pasahero cu a yega for di Venezuela a denuncia na autoridadnan Arubano cu su amigo ciudadano Arubano a ser deteni pa Guardia Nacional.

En conexion cu e detencion di e caballero di inicial C.C., DIARIO a haci un investigacion riba e caso aki.

Segun informe, e amigo a relata na autoridadnan cu supuestamente un wasbak na Aeropuerto Jose Camejo lo a kibra y falta lo a ser tira riba

e joven di inicial C.C.

El a ser deteni, y den curso di ayera el a regresa Aruba despues di a keda 24 ora deteni sin cu ela ricibi un plato di cuminda.

Un conocir di dje mester a paga e suma equivalente na 80 Florin pa e wasbak cu segun informe tabata casi cay y mala suerte a toque cu e lo a mishi na esaki y el a cay kibra.

Un ruman di dje a sali rumbo tambe pa Venezuela pa regla y busca drechi di su

ruma cu mientras tanto a regresa Aruba.

Si no tabata asina, e lo a keda pa algun dia cera djis pa e wasbak cu a kibra na aeropuerto.

Ademas, DIARIO a compronde cu e joven C.C. ta sinti falta di su carterá cu tabata tin placa den dje tambe.

E noticianan aki sin duda alguno ta duna hende un miedo pa viaha pa Venezuela.

COSTA RIVIERA A DRENTA HAF DI ORANJESTAD



ORANJESTAD [AAN] Ayera 27 di januari a drenta haf di Oranjestad, e bapor di turista "Costa Riviera" di e Compania Costa Cruises, cual barco cuminsando ayera lo toca nos porta tur siman riba dialuna te cu 1994.

E barco ta pertenece na Costa Cruises, cu tabata un compania den pasado cu tabata tin hopi di nan barco cu tabata bishita nos isla frecuentemente.

E barco a yega Aruba cu un

total di 887 pasahero y un tripulacion di 497. E ruta lo ta saliendo for di San Juan Aruba-La Guaira-Grenada-Martinique-St. Thomas-San Juan.

Antonio Leo, senior official PR. di Direccion di Turismo a entrega e capitán Aldo Nardini un plakaat den nomber di gobierno y pueblo di Aruba. Na e acto aki tabata presente Hans Henriquez, director di Maduro & Sons,

Mingo Salazar y Chicho Erasmus representante di Maduro & Sons, Leo Kuiperi PR di Orma, Juancho Lampe verificateur di Korps Douane, Ronny Winklaar y srta. Ina Dubero, representante di APA, R.A. Zeppenfeldt, Eddy Bennett y tambe e hotel director di e barco, Raffaele Gualco.

Despues di e acto e capitán a ofrece un almuerzo na tur presente.